

LA LENGHE

La lenghe e je la indicazion dal temperament, des inclinazions, des risorsis, des fuarcis e des debolecis, dai orientaments, des pussibilitâts di assorbiment e di resistance di un popul, e je il speli coletîf, sigûr, sancîr, de anime di une coletivitât, e je ancje, voie o no, il segnefiere de purece e de prevalence fisiologjiche di une raze; e je la confession involontarie e incussiente de indipendence spirituâl, de energjie endogjine, de personalitât e de filusumie morâl, dal pont di viste di evoluzion civîl, e dai difiets, des mancjancis, dai miscljaments, dai vizis, de decjadence, de tristerie, de coruzion e e cjamine, si slargje e si strenç, si manten e si coromp, si conserve e si cambie, e vîf e e mûr secontri che si ferme o che al va indenant, che si slargje o che si strenç, che al si mantèn san o che al fraidès, che al dûre e che al si mude, che al vîf o che al mûr un popul.

La lenghe in sumis e je la spie fedêl di dute la anime, sedi di une persone, come di un popul.

Fintremai che un popul, cun ducj i rapuarts voluntaris o no cui siei vicinants, al manten la sô lenghe, al è segn che nol à pierdude la sô personalitât, che no si è messedât, che no si è bastardât, che nol à rineât se stes.

Cuant che un popul al rive adore di imponi il so lengaç a un altri, al è di sigûr un popul plui san, plui fuart, plui civîl, plui furnît di risorsis morâls che no chel altri. E cuant che al lasse corompi e pierdisi e murî il so lengaç al è un popul in dissoluzion, une sdrume di biade int cence coesion, cence fuarce, cence direzion. Cuant che un popul al va indenant, il so fevelâ si svilupe, si distire, si articole, si perfezione; cuant che al discjât, ancje la lenghe di ritire, si contamine, si implene di peraulis e di formis forestis.

josef marchet - "Patrie dal Friûl" 1946)